

# KALATE PAUL A NGA TILI BOTE YA GALATIA

## Mebatan

(Rôm 1 : 1-7)

**1** 1 Ma Paul, nlôman, sa wu w'aso e be bôt, nge amu bôt, ve amu Yésus Krist a Zambe Esaa, nyô a nga wômôlô nye akôlô miñwuan, 2 a bobejañ bese bia be be bi too m'atili bekirké ya Galatia : 3 mvam é bo'ô be mia a mvo'é bi so'ô be Zambe Esaa wongan a e be Nti Yésus Krist, 4 nnye a nga ve émien amu mam abé mangan ane a ye vaa bia e be mbia miaé nyô aval ane nkômbane Zambe Esaa wongan, 5 duma e bo'ô be nye nnôm éto a nnôm éto. Amen !

## Mbamba Foé Mfe A Nji Bo

(Gal 3 : 1-5 ; 4 : 9-20 ; 5 : 1-12)

6 M'asémé na, mi ji'aya kôlô e be nyô a nga loene mia e mvame Krist, a ke tône mbamba foé mfe, 7 nnye a nji bo mbamba foé mfe ; ve bôt béziñ be ne, mmbe b'andéñele foé Krist. 8 Ve ja'ana bia nge éngel a so e yôb a ne kate mia mbamba foé a sela'ane nyô bi nga kate mia, a bo'ô biyo'é. 9 Aval ane bi nga taté jô nalé m'abeta jô éto ji na, nge môt éziñ a kate mia mbamba foé a sela'ane nyô bi nga nyoñ, a bo' biyo'é.

10 Nde éyoñe ji, ye me ye'e bôt nge Zambe ? Ye m'ajeñe na me bo ane bôt b'anye'e minlem ? Nge me ngenan me bo'ô ane bôt b'anye'e wôna me nji fe bo mboésaé krist.

## Ane Paul A Nga Teléban Nlôman

( M.M. 22 : 3-16 ; 26 : 9-20 ; 23-30)

11 Amu na, A bobejañ, m'akômbô mi yeme na, mbamba foé me nga kat, a nji bo nyô a so e be môt , 12 amu me nji ke nyoñ nge ye'é nye e be môt, ve amu nkulane Yésus Krist.

13 Amu na, mi nga wô'ôtane ntabane wom ya melu mvus e mbunan Beyude été, ane me nga daañe kpwe'ele Kirké Zambe a tyame je ; 14 a me nga ke ôsu e mbunane Beyude adañ abui bôte ya ôkala viam ayoñe dam été, nalé me nga dañe nyane miñye'elane bemvamba. 15 Ve éyoñ nyô a nga tobe ma te yen me za bialé'é, a loene ma amu mvame jé, 16 a nga yene mvaé ya liti me mone wé na, me kañete nye e be biku. Eté été me nji ke sili minsôn nge metyi, 17 nalé fe me nji bet e Yéroualem e be ba be nga taté bo minlôman a ma, ve me nga viane ke Arabia, ane me nga beta bulan e Damas.

18 Wôna, éyoñ mimbu milal mi lôteya, me nga bet e Yéroualem na, me yene Kéfas, ane me nga tabe e be nye melu awôm a metan. 19 Ve me nji yene môt mfe ya minlôman, vengevenge ve Yakobus, monyañe Nti. 20 Mfa'a ya mam m'atili mia ma, mi lôô, me nji laa minsos asu Zambe. 21 Wôna, me nga ke e mefôla ya Silisia. 22 Eyoñ éte

bekirké ya Yudéa be ne ba be Krist, be nengan te yen asu dam ; 23 ve be nga wô'ô na, nyô a nga bo a kpwe'ele'e bia melu mvus, éyoñe ji a kañete foé ya mbunan a nga taté tyam. 24 Ane be nga wumulu Zambe amu ma.

## **Minlôman mife mi nga kañese Paul**

( M.M. 15 : 1-29)

**2** 1 Wôna, mvuse mimbu awôm a minyin, me nga beta bet e Yérusalem bia Barnabas, me nga ke fe Titus nsamba wom. 2 Me nga ke wôé ane nlitan, émo'o été, me nga liti be asu ba be nga dañe wum, mbamba foé m'akañete biku, a za bo na, m'aye ke mbil, nge na, me nga ke mbil ékekeé. 3 Ve ja'ana Titus, nnye bia nye bi nga too, akôsabo a mbe mone Begrek, a nji tindibane na a tyi'ibane atye. 4 Ve e nga bo nalé amu bobajañ be ne minsos be nga nyiin été asoé. Be nga somesan été na, be loé éto nti jangan, nje bi bili e be Krist Yésus, ane b'aye kee bia éto belo. 5 Ve bi nji ve be mewôk, ja'ana mon éyoñ, nalé benya mejôô ya mbamba foé b'aye tabe e be mia. 6 Ve mfa'aya ba be nga wumu na, be ne biwôlô, aval ese be mbe, nalé a nji bo me jam ; Zambe a ne te semé mô't mfa'a ya mesu, mbe m'ajô na, ba be nga wum bete be nji kô'ôlane me jam. 7 Ve e nga viane bo na, ayene be nga yene na, mbamba foé a nga veban e be ma ajô ba be ne te tyi'ane metye, avale fe ane nyô ya ba be ne ntyi'ane metyel a nga veban e be Pétrus. 8 Amu nyô a nga telé Pétrus nlôman e be bôt be ne ntyi'ane metye, nnye fe a nga telé me na, me bo nlôman e be biku. 9 Nde, éyoñ be nga yene mvam é nga veban e be ma, Yakôbus a kéfas a Yôhanes, ba be nga wum a ane beyôm mekôn, be nga ve bia Barnabas mbonnôm ya mfula'ane, ane bi nga ke e be biku ; be ke e be ba be ne ntyi'ane metye. 10 Ve be nga kômbô bi simesane minzôzoé, jam ete ébiene fe me nga nye'e me bo'ok.

## **Paul a komekane Pétrus e Antôkia**

( M.M. 11 : 1-17 ; 15 : 7-11 ; Gal 3 : 10-14, 21-28 ; 5 : 1-6)

11 Vé éyoñe Kéfas a nga kui Antiôkia, me nga sôane nye asu dé, amu a nga bili mekua. 12 Amu na, éyoñ éte bôte bevok be nengan te so e be Yakôbus, a nga bo a ja'ak baa be biku, ve éyoñ be nga kui, ane a nga dutan a kandane be, amu a nga ko ba be ne ntyi'ane metyele woñ. 13 Ba be Beyude bevo'o be nga bo medu'ane mete, nalé ate, ja'ana Barnabas a nga dutubane e medu'ane mab été. 14 Ve éyoñ me nga yene na, be nji wulu zôsôô aval ane benya mejôô ya mbamba foé be né, me nga jô Kéfas asu dab bese na, Nge wo ô ne mone Beyude w'anyiñ ane Mone biku, a sa ane Beyude, amu jé w'atindi bikul na, bi nyiñ ane Beyude ?

## **Beyude a bikul b'anyiiban amu mbunan**

15 Bia bi ne Beyude amu abialé, a sa beboabé b'aso e biku. 16 Amu bi ayeme na, mô't a nji kabe amu mimboane mi mame ya metiñ, ve amu mbunan a buni Yésus Krist. Bia bi nga buni Krist Yésus, ane bi ne kabe amu mbunan bi abuni Krist, a sa amu mimboane mi mame ya metiñ ; amu teke'e mô't a ne kabe amu mimbôane mi mame

Rev. Matthias MEYE

Secrétaire Général 1961.....

ya metiñ. 17 Nde, éyoñ bi nga jeñe na, bi nyoñe makabe amu Krist, bia fe bi yenéya beboabé, ye Krist a ntoo mvolô abé ? Teke'e bebé ! 18 Amu na, nge m'abeta lôñe mam me nga tyam, nalé a liti na, mamien me ntoo ntyame metiñ. 19 Amu mfa'a ya metiñ, me nga wu amu metiñ, nde m'aye nyiñ mfa'a Zambe. 20 Me nga tyeléban e krôa bia Krist ; a sa fe ma me vee, ve Krist nnye a vee e be ma ; a ényiñ me vee je e miñsôn eyoñe ji, me vee nalé amu mbunan m'abuni Mona Zambe, nyô a nga nye'e ma, a va émien amu ajô dam. 21 Me nji biasé mvame Zambe, amu na, nge mekabe m'aso amu metiñ, wôna krist a nga wu éwuwui.

### Metiñ nge mbunan

( Rôm 3 : 19 ; 4 ; Gal 4 : 9-20 ; 1 Tés 1 : 5, 6)

**3** 1 A miñsusu'u mi bôte ya Galatia ! Za a nga ndumetane mia, mia bete Yésus Krist a nga tu'a litiban, ntyelan e krôa e mise menan été ? 2 Jame dina étam m'akômbô ye'é e be mia. Ye mi nga nyoñe Nsisim amu mimboane mi mam ya metiñ, ye amu mbunane ya jam mi nga wôk ? 3 Ye mi ne aka'a miñsusu'ete ? Mi nga taté a Nsisim, éyoñe ji ye mi asondô a minsôn ? 4 Ye mi nga jibi abime mam ete éjibijibi ? Nge e ne fo'o éjibijibi. 5 Nyô a ve mia Nsisiim, a bo bitua bi mam e be mia, ye a ye bo nalé amu mimboane mi mame ya metiñ, nge amu mbunane ya jam mi nga wôk ? 6 Aval ane Abraham a nga buni Zambe, ane a nga lañebane na, a ne mekabe.

7 Ajô ete, mi lôô na, ba b'abuni mbe be ne bon be Abraham. 8 Vôm ntilan ô nga taté yen ôsu na, Zambe a ye kale bikul amu mbunan, ô nga taté kat Abraham foé na, " meyoñ mese m'aye yen ébotan e be wo." 9 Ajô ete , ba b'abuni be ntoo ébotan baa be Abraham, nyô a nga buni. 10 Amu na, ba bese b'atôñe mimboane mi mame ya metiñ, be ne e biyo'é si ; amu e ne ntilane na,

" Biyo'é bi bo'o be mô't ase a nji langan a bo'o mam mese me ne ntilan e kalate metiñ été."

11 Amu e ne fo'o bebela na, teke'e mô't a ne kabe e mise me Zambe amu metiñ, amu na, zôsôa mô't a ye nyiñ a mbunan, 12 a metiñ me nji bo jam ya mbunan, ve na, nyô a bo me a ye nyiñ a me. 13 Krist a nga kôté bia e biyo'é ya metiñ, vôm a nga nyoñe biyo'é amu ajô dangan ; amu e ne ntilane na,

" Biyo'é bi bo'ok e be mô't ase a tyele élé."

14 Nde ébotan Abraham j'aye kui e be bikul amu Krist Yésus, nalé amu mbunan, bi aye nyoñe Nsisim ô ne ntiñetan.

### Metiñ a ntiñetan

( Mik 7 : 20 ; M.M. 3 : 25, 26 ; Rôm 4 : 13-17 ; 10 : 4-13 ; Ef 3 : 6)

15 A bobajañ, m'akobô ane éve'ane ya mô't na, mô't a nji wôé éza kalate élik ntuk, nge kô'ôlane jam afe été éyoñ ôyili ô maneya boban. 16 Nde mintiñetan mi nga boban e be Abraham a mvoñe jé, a nji jô na, memvoñ aval ane nge me ne abui ; ve aval ane e be mvoñe jia, na E be mvoñe jôé, e ne na Krist. 17 Jam ete nde m'ajô na, metiñ mete me nga so e mvuse mimbu mintet minyin a mewôm mela, me vo'o wôé kalate élik ntuk, nnye Zambe a nga yemete ôsusua, ane me ne te'elane ntiñetan ôte. 18 Amu na, nge nyoñan élik ô ne amu metiñ, wôna ô nji fe nyoñeban a

Rev. Matthias MEYE

General

ntiñetan ; ve Zambe a nga ve wô Abraham e zesé amu ntiñetan. 19 Ajô ete metiñ m'avolô jé ? Me mbe nkô'ôlan amu ntyamane metiñ, akekui éyoñ mvoñ éte j'aye so e be nyô ntiñetan ô nga veban ; a beéngéle be nga telé me e wo Ntebe-zañ. 20 Ve Ntebe-zañ, a dañe tañe ya môte wua, ve Zambe nnye a ne wua.

21 Ajô ete , ye metiñ m'awosane mintiñetane mi Zambe ? Teke'e bebé ! amu na, nge metiñ me nga veban, me mbe ngule ya ve bôt ényiñ, wôna zôsôô a nga ye fo'o bo amu metiñ. Ve ntilan ô nga dili mam mese abé été, nde ete, ntiñetan w'aso mbunane ya buni Yésus Krist w'aye veban e be ba b'abuni.

23 Ve éyoñ mbunan ô ngenan te so, bi mbe mftetan e metiñe si, mba'alan mfa'a ya mbunan ñwô ôte w'aye kuliban. 24 Ajô ete, metiñ me mbe ñye'ele wongan mfa'a ya kee bia e be Krist, nde bi a ye kaleban amu mbunan. 25 Ve éyoñ mbunan ô soya, bi nji fe beta bo éjôé ñye'ele ate si.

26 Amu na, mia bese mi ntoo bone be Zambe, amu mbunan mi abuni Krist Yésus. 27 Amu na, abim ese mi nga baptizôban e be Krist, nde ete e nga jaé Krist. 28 Mone Beyude a nji bo nge mone Begrek, ôlo ô nji bo nge nti, fam é nji bo nge minga, amu mia bese mi ne jôme jia e be Krist Yésus. 29 Nde, nge mi ne ba be Krist, wôna mi ne mvoñ Abraham a benyoñe ngabe ya élik aval ane ntilan ô né.

**4** 1 Nde m'ajô na, nté ôse nnyoñ élik a ngenane mongô, a nji selan a ôlo mfa'a éziñ, akôsabo a ne miene ya biôme bise ; 2 ve a ne éjôé beba'ale a bivét e si, akekui éyoñ ya ésa a nga tiñeti. 3 Aval ete fe bia, zia melu bi mbe bongô, bi nga too belo a metata'a bifia ya mame ya si nyô e si. 4 Ve éyoñ éyoñ é nga sondô kpwaan, Zambe a nga lôme Mone wé, mbialan e be minga, mbialan e metiñe si, 5 nde ete a ye kôté ba be mbe e metiñe si, ane bi ne nyoñeban éto bon. 6 Nde, amu bi ntoo bon, Zambe a lômeya Nsisime Mone wé e minleme miangan été, ô yôta'ane na ; A Abba ! A Tat ! 7 Nalé ate ô nji bo ôlo, ve mon ; a nge ô ne mon wôna ô ne nnyoñ élik amu Zambe.

#### **Paul a tyelé nlem ajô bôte ya Galatia**

( Rôm 8 : 14-17 ; Gal 3 : 23-26)

8 Ve aso melu mvus, éyoñ mi nji yeme Zambe, mi mbe belo e be ba be nji bo bezambe mfa'a ya ékôma'a jab. 9 Nde, vôm mi yemeya Zambe, adañedañe na, vôm Zambe a yemeya mia, a ntoo aya ane mi abeta bulan e be mintetek a minzôzé metata'a bifia, mme mete mi akômbô beta bo belo ya été, ane mi nga taté bo ? 10 Mi aba'ale melu, a bengon, a biyoñ a mimbu. 11 M'ako woñ mfa'a wônane na, éyoñ éziñ me nga bo éaaé e be mia ébooboé.

12 A bobajañ, m'aye'elane mia na, bo'an ane me né, amu ma fe me ntoo ane mi né. Mi nji bo ma abé ; 13 ve mi ayeme na, amu ate'e ya minsôn, me nga kate mia mbamba foé éyoñ ôsu. 14 A jam e mbe mia meve'ele e minsône miam, mi nji biasé nge nyebé, ve mi nga nyoñe ma ane éngela Zambe, aval ane Krist Yésus. 15 Ajô ete, mekômba'a menan me ntoo vé ? amu me ne ngaa mfa'a wônane na, nge jam ete e mbe ngule ya boban, mi nga ye fôndé mise menan a ve ma me. 16 Nde ye me ntoo nsiñe wônane amu me nga kobô mia benya mejôô ? 17 Be nji jeñe mia mfa'a ya mbamba jam, ve m'akômbô na, be kuli mia atan ane mi ne jeñe be. 18 A ne mvaé na, be jeñe mia amu mbamba jam kom ése, sa fo'o ve éyoñ bia be mia bi too. 19 A ayôme bone dam, mia bete m'abeta kô'ôlô mie, akekui Krist a kômôneya minleme mienan été. 20 Me nga nye'e me too mia bebé éyoñe ji, ane me ne kôñelane tyiñe nkobô jam, amu me veme mia.



## Efunan Agar baa Sara

( Met 21 : 1-12 ; Behéb 12 : 18-24)

21 Katane ma, mia mi akômbô tabe e metiñe si, ye mi nji wô'ô metiñ ? 22 Amu ntilan w'ajô na, Abraham a nga bili bone bebaé, wua e be minga bisaé, nyô mbok e be lu'ulu'a minga. 23 Nyô ya minga bisaé a nga bialé ane minsôn, ve nyô ya be lu'ulu'a minga a nga bialé ane ntiñetan. 24 Mam mete m'aliti éfunan, amu binga bete be ne bilat bibaé ; wua a so nkôle Sinai, nnye a biaé bon ya éto belo, nnye a ne Agar. 25 Nde Agar nyô a ne nkôle Sinai ya Arabia, a funane Yérousaleme a ne éyoñe ji, amu a too éto belo baa be bone bé. 26 Ve Yérousaleme a ne yôb éte a ne nti, nnye ate a ne nyia wongan. 27 Amu e ne ntilane na :

“ Va'ak, A wo nkôkôm ô ne te biaé,

Tôta'ane jia a loñ ôyenga, wo ô ne te kô'ôlô mie ;

amu na, minga a ne nli'ian a bili bon abui,

a dañ nyô a bili nnôm.”

28 Ve mia, A bobajañ, mi ne bone ya ntiñetan, aval ane Isaac a mbe. 29 Nde, aval ane nyô a nga bialé minsôn a nga kpwe'ele nyô a nga bialé ane Nsisim éyoñ éte, aval ete fe e ne éyoñe ji. 30 Ve ntilan w'ajô aya ?

“ Tita'ane mingabisaé baa mone wé, amu mona mingabisaé a ye bo te nyoñ élik baa mona lu'ulu'a minga.”

31 Nde, A bobajañ, mi nji bo bon be mingabisaé, ve ba be nyô a ne lu'ulu'a.

**5** 1 Mfa'a ya éto beti Krist a nga kôté bia, ajô ete , yema'ane ngu, te beta bilan e éboñeté ya éto belo.

## Eto beti bekristen

( M.M. 15 : 1-10, 24 ; Gal 2 : 3-5 ; 3 : 1-7 ; 4 : 1-11)

2 Mi lôô, ma Paul m'ajô mia na, nge mi atyi'ibane metye, Krist a ye bo teke'e fe bo mia meyak. 3 M'abeta kate mô't ase a ye tyi'iban atyele na, a ntii mvôla ya ba'ale metiñ mese. 4 Mi kandaneya Krist, mia bôt mi akômbô kabe a metiñ, mi li'iya mvam. 5 Amu Nsisim ya mbunan, bi ayange ndinleme ya zôsôô. 6 Amu na, e be Krist, ntyi'an atye nge tee ntyi'an atyel bi ne te volô, ve mbunan w'abo ésaé a nye'an.

7 Mi nga mate mbil mvô'é, ve za a nga kame mia mi bo te bo benya mejôô mewôk ? 8 Ndutane wu ô nji so e be nyô a nga loene mia. 9 Mone mvusu a vusu ngum amama'a. 10 Me too ndinlem e be Nti na, mi aye bo te bi aval ôsimesan afe ve éñwom ; ve nyô a ndeñele mia nnye a ye nyoñe mekua mé, nyô ase a né. 11 Ve mia, A bobajañ, nge

me ngenane me kañete'e ntyi'ane metye, amu jé me ngane me wo'o ékpwe'ele ? Wôna, nkolan ôba'a ajô krôa ô vaseya. 12 Me nga ye nye'e na, ba b'andefnele mia be tyi'ibane ngume jôm !

13 Amu na, A bobajañ, mi nga lobane mfa'a ya éto beti, ve na te veñesan éto beti jenan jôm ya bo mam ya minsôn ; ve amu nye'an, bo'ane miabebien bebobisaé e be ba bevok. 14 Amu metiñe mese m'atôéban e be éfia jia jina na, " Nyeke'e ébemôtô ane w'anye'e womien." 15 Ve nge mi alôb a di miabebien, taba'ane ntye, mi za jiane miabebien.

### **Ebuma Nsisim a mimboane minsôn**

( Rôm 8 : 1-14 ; 13 : 12-14 ; Ef 5 : 1-12 ; Kol 3 : 5-15)

16 Nde m'ajô na, wula'an a Nsisim, ndemben mi aye bo te jalé mbia minkômban ya minsôn. 17 Amu minkômbane ya minsôn mi awosan Nsisim ; A Nsime fe w'awosan a minsôn ; amu biôm bite bibaé bi asian, jia j'asiñe ji évok ; nde ete mi aye bo te bo mam mi anye'e. 18 Ve nge mi awulu a Nsisim, wôna, mi nji bo e metiñe si. 19 Ve mimboane ya minsôn mi ayené mi ne na, mejian, mvin, mbia bisok, 20 nkañane ngunemelan, mboane bemvi'i, ziñ, nkañete, mesengan, ayaa, metyama'ane, nso'ane bilam, mbia ndian, avale mam ete mme m'alebe mia, aval ane me nga taté lebe mia, na, ba be wô'ô bo aka'a mam ete b'aye bo te nyoñe ngabe ya éjôé Zambe.

22 Ve bibuma bi Nsisim bi ne na, nye'an, mevak, mvo'é, évôvoé, njiban, mvam, zôsô, mbunan, 23 nje'ebane nleme si, njôane nlem, atiñ d'avini avale mam ete e ne momo. 24 A ba be ne e be Krist Yésus be tyeléya minsôn e krôa yôb a fulan ayôñe minkômban a minyamete ya été. 25 Nge bi anyiñ a Nsisim, ñwula'ane fe a Nsisim. 26 Mbo'ane te boane bivuvu'u mebun, te soñane biabebien a bo mesengan.

### **Mbe'ane mimbe'e mi bôte bevok**

( Rôm 12 : 3, 16 ; 14 : 10-12 ; 15 : 1, 2 ; 1 Tés 5 : 14)

**6** 1 Abobejañ, nge mô't éziñ a biliya nkôban éziñ été, mia mi ne ba ya nsisim, mi beta'a sôan avale mô't ete zôsô, a nsisim ô ne nje'eban. Fombô'ô womien, wo fe ô za yene mevé'ele. 2 Miabebien beka'ane mimbe'e mi ba bevok, nalé mi aye jalé metiñ me Krist. 3 Amu nge mô't éziñ a simesane na, a ne jôm éziñ, vôm a se ke nalé, a du'u émien. 4 Mô't ase a fase' mboane wé émien, éyoñ éte a ye bi дума dé d'aso be émien étam, sa di d'aso e be mô't mfe. 5 Amu mô't ase a ye be'e mbe'e wé émien. 6 Ve na, nyô a ye'é mejô, a va'a nyô a ye'ele nye ngab ya mbamba be biôm bé bese. 7 Te du'uban, b'asôsômôlane Zambe : amu jôm ése mô't a mias nje éte fe a ye kôan. 8 Amu nyô a mias mfa'a ya minsône mié émien, a ye kôane bibole bi mame ya minsône mié émien. Ve nyô a mias mfaa'a ya Nsisim a ye kôan ényifne ya melu mese j'aso e Nsisim. 9 Mbo'ane te kate bo mbamba be mam, amu na, bi aye kôan éyoñ j'ayian nge bi abo te tek. 10 Ajô ete nde, nté bi bili éyoñ, mbo'ane bôte bese mbamba be mam, adañedañ e be ba be ne nda bôte ya mbunan.


## Meleb m'asu'u'lan a mbamba njôan

( Gal 5 : 5-10 ; Fil 3 : 2-11)

11 Tama yenan aka'a beta bikanga me tiliya a wo wom mamien. 12 Ba bese b'akômbô bo melitan mfa'a ya minsôn, mmbe b'ayemete mia na, mi tyi'ibane metye ; ve amu be nji kômbô wu ékpwe'ele ajô krôa Krist. 13 Amu na, ja'ana bentyi'ibane metyele, bebien, be nji ba'ale metiñ, ve b'akômbô na, mi tyi'ibane metye, ane be ne wumu bebien e minsône mienan. 14 Ve mfa'a wom, e bo'o teke'e bébé na, me wum a jam afe, vengevenge ve krôa Nti wongan Yésus Krist, nje éte si nyô é nga tyeléban e krôa yôb mfa'a wom, a ma mfa'a ya si nyô. 15 Amu na, ntyi'an atyel ô se ke jôm, nge te ntyi'an atye, vengevenge ve mfefé ntéan. 16 Mvo'é a nkoan éngôngo bi ta be'e e be abime bôt d'awulu atiñe dina été a e be Israël Zambe.

17 Ataté éyoñe ji, mô't a bo'o' te beta ndeñele ma, amu me be'e bifele ya ajô Yésus e nyôle jam.

18 A bobajañ, mvame Nti wongan Yésus Krist é tabe'e e be minsisime mienan. Amen !



Rev. Matthias MEYE  
Secrétaire Général 1961.....